

東
華
續
錄

東華續錄

嘉慶三十一

臣王先謙敬編

臣周倫蓀恭校

嘉慶十六年辛未春正月丙辰諭軍機大臣等本日據托津等奏到各摺朕詳加披閱所查河工弊竇各款大半付之空言河工連年妄用帑銀三千餘萬兩謂無弊竇其誰信之朕特派托津等前往查辦托津係國家重臣初彭齡素稱敢言茲於特交事件如此將就了事此後若別經有人告發或參出實據伊二人將何顏見朕乎且伊等所奏提查工員帳簿見在欽差到彼工員帳簿多係捏造何足爲憑托津等不認真訪察僅以查帳爲據焉能究出弊端畢竟此三千餘萬帑金原不盡歸侵蝕其中何人浮冒及何處妄興工段濫用虛糜係必有之事著確查具奏毋稍含混至刻下

河務情形以清水能否暢出爲第一緊要關鍵伊等亦未詳悉奏
明目下清水甚弱義壩堵閉之後又曾蓄高若干轉瞬糧艘北來
如潮水不能暢出將用何浮送朕節經降旨不許再借黃濟運伊
等惟知頌聖並云俟陳鳳翔到任後遵旨辦理究竟不借黃濟運
應如何設法引出清水實在微弱則撥運事宜亦應早爲計及豈
竟互相推諉坐待貽誤此事譬托津初彭齡松筠吳璣會同許兆
椿陳鳳翔查勘水勢情形熟商妥議籌定辦法迅速由驛覆奏再
松筠職任係兩江總督河工不過兼轄非其專責如河工有須地
方官員協力之處伊幫同調遣不致掣肘其河員內有侵貪不職
劣蹟伊據實糾參若一切發帑辦工等事轉不必以身獨任致多
牽礙○戊午以巡防南河馬港口河岸新築長隄添設淮海道一
員駐紮中河以桃北中河山安海防四廳屬之並設海安海阜同

知兩員守備把總各二員移海州州同阜甯縣縣丞分駐南北兩岸○丙寅允廷臣請編御製詩二集○壬申增設直隸建昌赤峰二營都司朝陽營守備並千總把總外委各一員兵四百十名○癸酉以百齡爲刑部尙書調松筠爲兩廣總督以勒保爲兩江總督

由刑部尙書遷

二月壬午上御經筵○丙戌諭軍機處爲極密重地滿漢章京趨公執事先以謹慎爲本從前御史吳邦慶條奏大員子弟不准充補軍機章京經軍機大臣議覆自道員以上子弟皆令回避其有行走在先者並隨時請旨定奪茲據慶桂等奏新授南贛道查清阿之子誠端應否回避朕思謹慎與否總視乎其人而防閑之道亦必當定以限制嗣後文職京官三品以上外官臬司以上武職副都統以上外官總兵以上其親子弟不准在軍機章京上行走

其行走在先者亦無庸隨時具奏卽令照例回本衙門當差誠端
係道員之子無庸回避○丁亥 上釋奠先師孔子○諭托津等
奏查明南河節年銀款工程分別覈辦參奏一摺近年以來南河
鉅工林立費用綦繁統計各項銀數不下四千餘萬而每年歲搶
修各工甫經動項興修一遇大汛卽有盤塌淤墊之事甚至上年
堰盱瓢石各工掣塌四千餘丈之多恐承辦工員自不免有偷減
浮冒情弊是以特派托津初彭齡前往徹底查辦茲據覆奏到江
後卽親赴工次徧加察驗並將各年文卷印領逐層覈對所發銀
兩與各工所領數目均屬相符是銀款出入尙無虛捏情弊惟支
領後該工員不能如式實心辦理以致新工未竣舊工復生而歷
任河督等又未能經理協宜均難辭咎其中有自乾隆五十七年
起至嘉慶十四年止已經題銷尙未找領之款銀六十萬六百兩

零據查此款虛懸日久工程已無可考且經手工員又多升遷事故未便復行找領致滋冒濫等語著照所請所有前項未領一款竟無庸再行找發以歸覈實其十四十五年加培黃運中河大隄土工夫役增價覈計多用銀四萬八百餘兩及上年挑復海口時酌量接濟疲累工段所借銀數覈計共有十萬六千餘兩均著陳鳳翔分別勒追以清款項又挑挖淮北鹽河一事雖係豫行挑挖以備宣洩盛漲但於減壩興工之前該河督等未經先行奏明殊屬疏忽且查所辦工段已有淤墊處所所有此項工用銀八萬三千餘兩著吳璥徐端照數分賠完繳均仍交部嚴加議處其另單所開承辦工員除已故及革職治罪各員外其餘四十五員名均著照所請革職但念聚令離工一時全易生手未免貽誤且未便令其置身事外著將各員弁中見任者姑留本任候補者留工

效力各限三年如果各知奮勉所修工段並無掣場屆時再請開復如限內再有疏失著陳鳳翔隨時參奏定當加倍治罪至原任道員葉觀潮所管地方屢有漫口大工實屬漫不經心著卽革職留工以觀後效歷任河督徐端前已降旨懲處外戴均元吳璈均在任年餘著交部分別嚴加議處那彥成在副總河任內已歷數月亦著交部議處尋議上得旨吳璈素曉河務前後在任年分最久因循貽誤且任內又有挑挖鹽河應奏不奏一案伊見已衰病豈能勝尙書之任著照部議降四級調用仍於補官日降三級留任戴均元在任年餘亦不能查出弊端姑念河工非所素悉其在任年分較吳璈爲淺著加恩改爲革職留任那彥成本不諳河務在任僅止數月著加恩改爲降四級留任○甲午 莊如堯上至吉安所賜奠○丁酉諭齊布森奏暫護撫篆一摺朕因鄂雲

布見在年老令其來京另候簡用並非因事罷斥亦非有緊要差使須伊來京辦理鄂雲布接奉此旨自應一面具摺謝恩仍候同興到黔之後交印起程方爲正理乃齊布森甫經到任一切尙屬生疏鄂雲布於兩日之內卽將巡撫篆務移交護理遊行起程實屬太不曉事昨因文弼換班回京不候接任之員交代將印務諉之陽春會交部議處貴州爲苗疆要地巡撫責任較之駐藏大臣尤爲重大且文弼雖恩促回京而陽春尙係同辦事之大臣今鄂雲布不俟新任交代將篆務交初到之藩司護理卽行回京其咎視文弼尤重鄂雲布著交部嚴加議處尋議革職得旨加恩以六部筆帖式用○戊戌諭朕恭閱 皇考高宗純皇帝實錄內載乾隆四年十二月欽奉 諭旨四執事總管首領將太監李蟠放假四五日往弘哲處將宮內之事信口傳說太監等告假不過一日

兩日豈有四五日在外之理將四執事總管首領查明議罪爾總管等曉諭旗下太監等既已身離旗下復往何爲見今將李蟠夾訊卽是榜撻等因欽此仰見我 皇考整肅宮廷嚴禁弊端之至意旗下太監旣送進宮內服役卽不應再回伊原主家中所以嚴內外之防而杜關通之漸乾隆年間宮中太監尙多其由旗下交進者少彼時尙有如弘智家所交之李蟠藉放假爲名竟敢私回伊原主家中傳說宮內之事况近來宮內太監較少由旗下交進者多豈能皆是善良恐賸玩性成未必不出外滋事茲特嚴定章程嗣後旗下太監一經送進宮內當差不許再回本主私宅該王公等於交出之後再見該太監潛來私宅卽著立即斥逐勿准片刻逗留如斥逐不遵或仍行潛往卽著鎖拏奏交以便懲創止治該太監之罪其本主皆毫無不合若不斥逐拏解或竟任其傳說

宮內之事一經發覺不但重治該太監之罪其本主亦獲戾不小
必不姑貸將此旨通諭諸王公知之仍載入宮中見行則例○丁
未諭向來耕藉典禮於親耕後升觀耕臺閱視從耕之三王九卿
以次俱畢然後順天府尹等率父老耆民等謝恩維時父老等
散布耕田招集需時行禮慮遠未足以肅觀瞻嗣後著該府尹等
豫飭父老耆民整齊排列於親耕後升觀耕臺時卽率領至臺下
先行謝恩朕俟謝恩禮畢再閱從耕用昭整肅

三月辛亥 上親耕藉田○甲寅諭內務府奏開列恭從採桑福
晉命婦清單奏請欽點一摺每年皇后親蠶以福晉命婦七人隨
從採桑係屬大典乃近年來開列單內除近支福晉外大率係皇
后姻親意在於藉此請安所以年年開送其餘多託故不與此次
開列單內僅止九人其中大臣命婦則止有二人自係各該大臣

等不令其妻恭與典禮是以託故不行開送似此積漸因循必致開列人數不敷點派成何事體此次姑就單內圈出七人以備典禮嗣後各該大臣命婦除實係有故照例聲明免其開送外餘俱著一併開列如仍前託故規避致人數短少著內務府查明無故不到者將該命婦之夫參處○諭宗人府議駁御史伯依保條奏宗室人員請添派學習行走員數一摺所駁甚是我朝家法宗室人員以學習清語勤肄騎射爲重卽文學科名尙非所急是以宗室考試之例從前乾隆年間卽會欽奉 皇考高宗純皇帝聖諭停止所以定其趨向一其心志不至荒棄本業也近年來宗室生齒日繁朕慮其無進身之階屢經加恩於六部理藩院添設司員十六缺並准令鄉會試又增添宗學學生六十名見在宗室登進之途不爲不廣今該御史又以宗室人多差少請將候補人員分

部行走無論見在宗室候補未經得缺者止有一人該御史人多
差少之言已爲不確且其意不過欲宗室等多得文職其流弊必
至重文輕武或竟希圖外任將來清語騎射鮮有究心之人於滿
洲家法殊有關繫該御史年老平庸必係聽人慫慂爲此見好之
奏應無庸議○己未諭軍機大臣等前據陳鳳翔奏於本月初一
日開放禦黃壩今已十日尙未據奏到開壩後是何情形見在黃
水高於清水五尺有餘而下游將近海口之大淤尖地方又形淺
滯即使本年糧運尙可勉強通行日久終恐貽誤不可不豫爲之
計因思海船試運一事上年據章煦覆奏吳淞一帶尙有沙船可
雇果能試行有效則來年即可踵行比之撥運截卸一切事宜皆
爲徑捷惟地方官辦事之始不無畏難此事全在該督撫實力講
求認真經理將此時應灑配若干船隻應撥用何項米石如何設

法交卸及旗丁水手如何安置均卽熟籌妥辦今歲不拘糧石多寡務卽趕緊試行均勿坐視因循又以海洋涉險爲詞率行推卸仍一面催趲重運北上至浙省雖向無海運出口章程其應如何幫雇船隻之處蔣攸銛亦應一體籌商互相經理方爲不負委任尋據兩江總督勒保等會議不可行者十二事一漕運惟元至元十九年始爲海運至明永樂十三年而罷然元明雖係海運而內河漕運仍不廢今以清黃交會之所消長靡常欲易河運爲海運俾得專治河淮爲一勞永逸之計若海運與河運並行則禦黃壩仍不能閉凡漕運官弁一切不能少減徒增海運之費一江南至天津海道必從吳淞江出口由崇明南茶山而北東過山東成山至綠水大洋西過之罘山又西北由大沽海口始達天津其開吳淞口之陰沙黃河口之大沙五條沙以及山東貓兒島沙門島等

處沙礁叢雜皆海道極險之處天庾正供非可嘗試於不測之地
一海行欲避外洋之險前代曾欲從膠西開鑿陸地徑通直沽海
口勞費不貲迄無成功雍正初朱軾亦奏開山東膠萊運道卒以
工力難施而止一海運若由旗丁領運則旗丁不習海洋若責成
船戶收兌則船戶非如旗丁有冊編審必致散漫無稽又難約束
且河運有總漕及巡漕御史等統領稽察復有各省糧道及地方
文武押送查催尙不免短缺黷變等事若改海運斷不能設立多
官出洋巡視將來船戶偷盜私賣捏報沈失甚至通盜濟匪等弊
皆所必有甫經肅清之洋面轉恐匪類萌生一海行風信靡常凡
商賈市舶往往飄至外洋經年累月而後返並有竟不能返者漕
船向在內河可以隨地催趲一出外洋其遲速平險皆非人力可
施設有耽延所關匪細一海運需籌經費查至元間每石給中統

鈔八兩五錢迨及至大延祐間加至十三兩彼時相距不過數十年而其費已加至三分之一方今物力昂貴以古準今其費必甚浩大一海運卽需用船計造海船一隻其大可裝載二三千石者估需工價不下萬金以全漕而論需船一千七八百號卽需銀一千七八百萬兩一造船旣不能行不得已議雇商船若照民間販運給值則需費不貲實難爲繼若止給官價則在官支發之數已多而船戶猶形苦累卽如閩洋勦匪添船多係隨時短雇大小多寡不等悉接受載石數月每石給銀七分截至上年二月已發過官價銀十九萬餘兩船戶等除領官價外又得行商津貼仍以賠累爲辭規避官雇今欲長雇運漕尤恐避匿不前難於雇覓況重洋巨浸必須船身堅大始敢開行吳淞一帶頭號沙船向赴天津貿易者止有四五十隻每隻帶米不過千石受載無多閩省惟赴

津大船始諸北洋水道亦屬不敷供運至粵省相距更遠其船向不能北行浙省則更無船可雇一查元明海運每年必有漂失之米統計到倉米石欠交者自數合至一斗數升不等今時生齒日繁常慮地之所產不敷人之所食豈堪再有漂失之數一海運卽須添設水師防護若令見有水師分段護送兵船少而梢船多適爲聲援鞭長莫及必致有名無實若每船配兵一二十名卽須設兵三四萬名所需糧餉又復不貲一京師百貨之集皆由糧船攜帶若改由海運斷不能聽其以裝米之船多攜貨物將來京城物價必驟加昂貴並恐官民日用之物皆致缺少於生計亦有關礙一運丁所用兵工短絳等項以每船二十人而論見用者八九萬人窮民賴以資生若改海運均須另募熟悉海道之人而此常年運漕之八九萬人一旦失業難保不流而爲匪亦非安輯之道得

旨前因洪湖洩水過多運河淺涸恐新漕北來阻滯是以令該督等兼籌海運以爲有備無患之策至其事之需費浩繁諸多格礙朕亦早經計及今據分款臚陳以爲必不可行自係實在情形此後竟無庸再議及此事徒亂人意河漕二務其弊相乘其利亦相因漕運由內河行走已閱數百年惟有謹守前人成法將河道盡心修治河流順軌則漕運按期遄達原可行所無事卽萬一河淤盈絀不齊漕船不能暢行亦惟有起剗盤壩或酌量截留爲暫時權宜之計斷不可輕議更張所謂利不百不變法也○壬戌 上臨莊敬和碩公主園邸賜奠○諭軍機大臣等本日勒保陳鳳翔奏報開放禦黃壩幫船行走順利一摺覽奏稍慰伊等以黃水直灌洪湖致湖身淤墊先將束清壩堵閉始將禦黃壩啓放該處有二壩擎托又有運口頭二三壩層層鈐束水勢不至建飯直瀉諸

獲平甯見在淮安各幫亦皆接續前進以目下情形而論重運正當喫緊而洪湖水力甚微亦止可如此辦理但此時運河全係黃水將來受淤必深且汛水長落無時恐兩岸漸形著重爲今之計惟有速將幫船趕緊趲行多趲一幫則可省一幫之累如果洪湖積蓄充盈早晚可以刷黃濟運則將來清霸啓放之後漕船自可暢行卽不然亦務須將頭二進幫船通行趲渡止留江廣幫船在後亦尙可籌辦剝運事宜須全漕不至貽誤方爲妥協○丙寅

上啓鑒謝

西陵並巡幸五臺山○免經過直隸州縣額賦十分

之三○庚午

上謁

泰陵

泰東陵至

孝淑皇后陵奠酒○

壬申免經過順天府大興等五州縣直隸清苑等十七州縣通賦○甲戌諭周系英奏辦理召試章程請旨遵行一摺向來迎鑾士子加恩召試雖經辦有成案但未明定章程辦理未能盡一自應

以其父兄官職之大小爲子弟應試之限制此次朕巡幸五臺所有應行召試士子京官除見任京堂及翰詹科道軍機章京外官除督撫藩司及道府以上之親子姪兄弟俱著回避無庸與試仍准其進冊其業經病故離任緣事在籍及其餘京外各官之親子姪兄弟俱准其與考嗣後巡幸各省設有召試之典卽照此例行○乙亥工部尙書費淳卒賞還大學士銜予祭葬諡文恪以其子戶部主事履升爲員外郎○以王集爲工部尙書崇祿爲左都御史和甯爲盛京刑部侍郎由大理寺少卿遷○戊寅免山西五臺縣額賦十分之三

閏三月庚辰 上駐蹕五臺山○免山西全省額賦十分之三○辛巳廣山西歲試學額○壬午賜召試舉人龍汝言等三人內閣中書附生李堂棟等六人舉人○乙酉 上回鑾○諭山西五臺

縣情涼山爲文殊演教之區靈蹟昭著我 聖祖仁皇帝親臨瞻
禮 皇考高宗純皇帝復屢次巡幸 鑾輅所臨布聞推恩 天
章魏煥典禮常昭康熙乾隆年間節經 敕命詞臣纂修清涼山
志刊刻頒發惟歷次 巡典尙未陸續全載本年朕初次臨蒞凡
行慶施惠各事宜悉遵 成憲推廣舉行亦宜載諸簡冊用示來
茲著交文穎館將清涼山志一書續行纂輯所有廟宇行宮及經
由道途前書有未載者著該撫速飭地方官繪具圖說咨送該館
辦理尋館臣董誥等奏查清涼山志恭載 高宗純皇帝五次巡
幸五臺山 聖製詩文惟六巡未經載入今遵照前例敬謹纂入
以成完書 皇上啓鑾至駐蹕清涼其閒謁 陵閱武額俊諸大
典有前志所未備者謹擬纂爲西巡盛典從之○減山西軍流以
下罪○壬辰復溫承惠一品頂帶○癸巳 上閱正定鎮兵○丙

申 上詣

堯母陵

帝堯廟行禮

○改雲南大理府同知爲東

川府巧家同知賓川州赤石崖巡檢爲普洱府他郎廳知事○戊

戌 上閱直隸督標兵○幸蓮池書院○減直隸軍流以下罪○

癸卯

上還京師○丁未以本智爲泰甯鎮總兵官吉綸爲理藩

院右侍郎調同興爲山東巡撫以顏檢爲貴州巡撫巴哈布爲雲

南按察使

由太僕寺少卿遷

夏四月戊申朔

皇后行躬桑禮○太子少師大學士戴衢亨卒

晉贈太子太師命榮郡王縣億帶領侍衛十員往奠茶酒賞銀一

千五百兩治喪入祀賢良祠予祭葬諡文端○己酉諭軍機大臣

等方維甸前任陝西巡撫時曾迎養伊母在署辦公之餘克資孝

養迨簡放閩浙總督之後伊母因道途遙遠於南方風土未習難

於就養方維甸當經具摺陳奏一面將伊母送歸江甯原籍自赴

閩省任事上年秋閒伊到熱河陛見時朕施恩詢及伊復瀝陳忱
惻朕念伊母高年患病方維甸孝養情殷兩地睽違殊增戀慕若
將伊調任兩江庶可就近侍養而又係伊原籍應行回避止得令
其開缺回籍養親此朕不忍拂人子至情曲爲體恤也方維甸自
回籍以後承歡侍奉伊母自己日就安健見在大學士戴衢亨因
在臺懷偶患時證不意爲醫藥所誤遽於昨日溘逝朕心悼惜此
時軍機漢大臣人少樞務至重朕於中外諸大臣徧加遴選惟方
維甸性情公直在軍機章京上年久熟諳事務人地相宜今特簡
用爲軍機大臣將來補放尙書用資倚畀伊母從前本在京邸久
住於北方風土素能習慣卽此時在江甯居住亦未必如在京邸
之服習伊若奉母來京於散直之餘朝夕侍奉豈不公私兩遂卽
遇巡幸亦不令伊隨往朕於方維甸母子之閒所以優加體念者

實爲無所不至今當辦事需人方維甸亦當仰體朕用人不得已之苦衷勉思報效伊將此旨告知伊母諒伊母亦必感激樂從但不知伊母見在身體情形究竟若何如果目下精神委頓實難遠行方維甸自應據實陳奏若酌量可以就道方維甸於奉旨後卽一面先行由驛奏聞一面親自奉母起程朕當降旨施恩著沿途地方官妥爲照料方維甸俟進山東境後再行來京謝恩供職○甲寅 上臨故大學士戴衢亨園居賜奠賞其子嘉端舉人○丙辰諭國家設立都察院堂官六科各道凡內自王公大臣外自督撫藩臬以至百職庶司如有營私輒法負恩瘞職者言官據實糾彈立卽按款嚴究執法重懲我朝 列聖相承綱紀肅清力除蒙蔽之弊朕祇遵 成憲太阿在握懲蠹鋤奸亦從不稍事姑息然事必覈實斯罰不妄施乃近年言官中竟有懷挾私怨陽沽鯁直

之名陰施報復之計以巧試其術者其初列款上聞浮言聳聽及查明毫無證據若將言官懲罰過重似杜敢言之路而被劾之大臣一登白簡雖辨明心迹謹責不加究以枉受誣讒使在廷之議謂其會遭指謫不免中懷畏飲損其精白之衷且君臣之間亦不若無此芥蒂益孚股肱心膂之義也卽如原任大學士戴衢亨果於任事惟性急語直每遇部院公事判別是非或從或違安能盡協人意因此爲怨者所詆前被給事中花杰封章參奏指稱伊與貢士洪瑩交往情密拔置一甲一名又黃旭試卷行楷相閒濫置二甲經朕密取殿試各卷加封呈覽特將洪瑩帶至上書房命二甲哥監看令其默寫試策惟時距殿試已閱兩月有餘洪瑩所書試策與原卷悉相符合不過數虛字間有異同其黃旭原卷未數行稍欠工整並無一筆行書當卽明白宣示剖分曲直本年己巳

科庶吉士散館朕料洪瑩黃旭二人文義必應考居前列若抑置在後非有心屏黜卽衡校未當及閱卷大臣公擬進呈拆閱彌封洪瑩黃旭同列一等設戴衢亨尙在派令閱卷必謂其徇情拔取卽不與閱卷之列亦或疑其轉相屬託今戴衢亨已故可見文章自有定評豈同列諸大臣至今日尙曲爲附和平戴衢亨蓋棺論定心迹已明應含笑泉下矣花杰從前憑空捏造誣陷大臣是誠何心姑置勿論嗣後諸言官務當各矢天良遇有不公不法之事必求確據直列彈章不可因有此旨緘默不言若以毫無影響之談誣人名節天鑒難逃國法具在懷之慎之○以河南開封等十一府州屬旱發倉穀平糶○庚申復孫玉庭二品頂帶○辛酉

上閱健銳營兵○甲子 上詣 黑龍潭祈雨○太子少保協辦

大學士刑部尙書長麟卒予祭葬諡文敏○丁卯諭向來 天壇

三大祀恭閱祝版時祝版玉帛香亭設於太和殿之西香亭設於太和殿之東及恭閱祝版玉帛香行禮後各安設亭內復詣東邊香亭行禮方始昇行朕思香亭之設原因祝版通誠於上帝故

必於香亭內上香行禮至昇行時卽昇於祝版亭之前今祝版亭安設在西朕止於香亭前望空行禮尙於義未協嗣後三大祀

閱祝版時祝版亭卽設於東邊香亭之後朕閱祝版後再恭詣香亭前向祝版上香行禮以昭祇肅○命修築直隸任邱等各州縣千里長隄並雄縣疊道○戊辰以京師及河南山東旱命清釐庶獄○壬申賜蔣立鏞等二百三十七人進士及第有差○癸酉諭軍機大臣等據方維甸瀝忱覆奏一摺前因軍機大臣需人朕念方維甸熟習機務是以降旨召伊來京並令伊察看伊母身體情形先行覆奏茲據奏伊母近日心神恍惚難以力疾遠行情詞

懇切朕聞之甚爲憐憫見在天氣漸熱方維甸母子不能暫離若令其母長途跋涉朕心殊爲不忍方維甸著不必來京仍在籍安心養親時屆端陽並加恩賞給方維甸之母香珠一匣香袋一匣香牌一匣摺扇一匣方維甸卽告知伊母俾其歡欣頤養可也○召錢楷來京以張映漢爲湖北巡撫陳桂生爲山西布政使錢臻爲山西按察使

由冀甯道遷

○裁直隸祁州州判涑水棗強二縣縣丞

赤城龍門二縣驛丞設平泉州州判建昌縣縣丞巡檢赤峯縣縣丞承德府司獄

五月辛巳命劉權之爲體仁閣大學士以吏部尚書鄭炳泰協辦大學士劉鑑之爲兵部尚書錢楷爲戶部右侍郎

前湖北巡撫

○甲申

以甘肅旱發倉穀平糶○丁亥 上詣 天神壇祈雨○諭本日

朕親詣 天神壇虔誠祈雨執事各員宜如何敬慎祇肅乃派充

典儀之贊禮郎國薩於應行唱贊送 神時率行唱贊送燎習屬
褻慢不敬若係他人唱贊錯誤不過交部嚴議處以革職卽問罪
亦止於發遣國薩係曾經身犯命案問擬絞罪之人彼時因伊父
扎郎阿執誥 壇 廟禮儀特加恩賞發交伊父在家管束嗣據
伊父扎郎阿稱其悔罪自新詣曉禮節唱贊熟練復錄用爲贊禮
郎又經補授實缺伊此次派充典禮自應倍加小心無敢褻越乃
竟漫不經心罹此錯誤其咎較重見已革職鎖拏著交刑部卽於
明日定擬具奏至扎郎阿並不認真教誨伊子輒屢次在朕前飾
詞妄譽此次復將伊子派充典儀希圖見長邀恩實屬徇私不職
本應卽予罷斥姑念其充當 壇 廟差使有年著加恩降爲贊
禮郎卽補伊子所出之缺哈甯阿明志二人亦屢次在朕前稱譽
國薩並將伊派充典儀明係袒庇同僚曲爲援引均應交部嚴加

議處惟本日哈留阿於圖薩錯贊送燎之時仍贊引送 神儀注
於行禮節次得以如儀尙不致誤哈留阿著從寬交部議處明志
著交部嚴加議處其餘管理太常寺福慶等各堂官均著交部議
處惟馬履泰係屬不諳清語著加恩免其議處再本日贊樂之贊
禮郎於圖薩錯贊送燎時若仍贊送 神樂則錯誤益多今並未
贊樂實屬胸有定見又司祝之贊禮郎及司香帛之在前列者俱
能循照定儀並未相率錯誤此三人均熟諳儀文著加恩各賞給
小卷紗一匹以示獎勵嗣後有似此曾經身犯重罪得邀寬宥錄
用之人遇有一切 壇 廟祭祀差俱不准派充執事以昭該肅
著爲令○戊子 上臨莊靜固倫公主園邸賜奠○諭圖薩充當
天神壇典儀於應唱贊送 神時輒唱贊送燎實屬藐越不敬
刑部擬以斬立決自爲罪所應得但念伊年幼糊塗因伊父扎郎

阿平素不行管教節詞妄譽且徇私派充典儀以致唱贊錯謬經刑部審訊尙昏然不知是其身罹大辟實由伊父溺愛之故其罪尙可末減圖薩改爲斬監候秋後處決○庚寅雨○命五城設廠平糶○癸巳 上詣 黑龍潭祈雨○甲午復雨○乙未恩長以

廢弛降調以長齡爲河南巡撫○癸卯調百齡爲左都御史崇祿爲刑部尙書○乙巳諭倉場侍郎會同巡漕兩御史議奏李亨特請將南糧全數自楊村起剝到場一摺所駁甚是南糧軍船例應到通起卸偶因楊村水淺不得已始用剝船原非定制剝船除官設一千五百隻之外其由直隸添雇者卽不能及官設之數軍船遇水大之時起四存六遇水小之時起六存四向係輪轉應用惟三進軍船末後數幫因恐回空太遲閒或全數起剝亦緣三進之後更無幫船始可將剝船儘用今若照李亨特所奏頭二三各進

幫船於行抵楊村之時俱令全數起剝則所需剝船過多何由敷用勢必前後積壓欲速轉遲重運回空豈不兩有耽誤所請斷不可行李亨特會任坐轎廳乃不能詰悉情形率爲此奏殊屬冒昧著交部議處

六月庚戌以王營減墻隄工復蠶革陳鳳翔翎頂疏防員弁革職逮問○王子諭昨諭軍機大臣傳訊明亮令將伊轎房賭博一事會否素知並伊何以知有御史條奏禁止賭博一一據實具奏今據伊登答各條顯多誑飾前日步軍統領衙門奏明亮於伊轎夫另住房屋之時會傳喚該處步軍校到家面爲屬付今明亮稱該步軍校並非由伊傳喚前往係因轎夫另覓房屋自赴明亮家關白伊因屬以轎夫僮或滋事卽隨時查拏等語步軍校並非明亮所屬若非明亮遣人傳喚何爲到伊家中殊非情理至明亮稱伊

於御史參奏轎房賭博一事係聞朝房窗外有人傳說不能辨其爲何人聲音等語更不成話明亮曾經奏稱伊從前因點放爆竹致將一耳震聾况時常召見常有錯聽朕語之時伊平日既未能審聽語言此時在朝房內何以又聞窗外之言且既不能辨別聲音又何由詳悉語句其爲掩飾更不問而知卽窗外私論密奏之事亦必低言細語斷無高聲大喊之理皆由伊從前在軍營中習慣編謊今陋態未除諸欠眞實至伊是日遣家人王福進城或竟係送信轎房亦未可定今伊稱係派令進城查察無論其詞不足憑卽使果如所言亦屬辦理不善伊旣欲查拏轎夫賭博卽當不動聲色親自進城徑往查看則轎夫自不能散走何必派人往查致轎夫等聞風逃逸耶此事明亮於奉旨傳詢之後不肯據實直陳本當卽行褫革懲治惟念伊舊有軍功見在加恩用至協辦大

學士年將八旬無庸再向詢問著先交部嚴加議處其究竟有無知情之處著軍機大臣仍會同刑部將伊家人等研訊具奏尋議上得旨明亮身為協辦大學士兵部尚書本應坐轎若僅止失察輜夫聚賭自行據實陳奏請罪不過交部議處卽議革任亦必加恩留任乃於輜夫開場聚賭平日既不能約束得信後又授意家人進城送信致令該輜夫等聞風逃逸種種回護欺飾殊失大臣之體不勝協辦大學士尚書之任本應照部議職職姑念明亮前同阿桂平定金川著有功績嗣勦辦三省邪匪於湖北孝感殲賊賊眾保護地方亦有微勞此次係因文職任內獲咎著將伊太子少保銜內大臣協辦大學士兵部尚書鑲藍旗滿洲都統閔兵大臣管理稽察 壇 廟事務尚書房總誥達清字經館總裁紫禁城騎馬雙眼花翎全行革去至伊所得伯爵係由軍功給予著加

恩仍留三等襲勇伯降爲二品頂帶賞給單眼花翎並賞給副都統署理富爾璦黃旗漢軍副都統出差之缺仍管理火器營事務輪流直班○癸丑諭大學士祿康兼任步軍統領專司緝捕凡京城內有犯禁不法爲匪滋事之案皆當嚴拏悞絕方使奸宄斂迹輦轂肅清乃平日一味寬厚不加整頓致涉懈弛前月御史韓鼎晉奏內城賭風甚熾多係諸大臣之轎夫開局等語朕密飭祿康英和查辦旋據祿康等摺獲二起具奏一係杏花天賭棍一係明亮轎夫而祿康於伊家內轎夫有無開賭情事則全不計及並不首先查辦迨朕詢及明亮伊奏稱心疑祿康轎夫亦不免此是以效尤朕卽於初五日密諭英和桂芳查拏英和桂芳隨於是日晚閒查明祿康轎夫徐四開局屬實拏獲案犯數人於初六日具奏當降旨交軍機大臣會同刑部審訊見據徐四等供認係十四年

十月起開局聚賭隨將局內夥犯多人一一供出並據供稱每日分給地面官錢八千又祿康宅中之家人張四內監楊二每日錢二三十千不等等語是祿康不但失察轎夫在外爲匪而於伊宅內家人內監等包庇縱容聯爲一氣亦竟憤然不知無能已極然其咎總在失察如果祿康今日自行具摺請罪不再回護則其過究非有心朕無不加之原諒將來吏議上時亦不過革職留任而止乃今日忽據奏稱伊於初六日早閒先已將轎夫頭徐四看押正在訊辦適英和桂芳遣人將徐四擊去等語所奏未免虛飾伊果有心查辦則五月二十九日奉旨之後隨時皆可訊問何以候之多日直至初六日始將徐四看押乎况英和等於初五日晚閒已將代徐四看房之王三潘二陳四等三犯擊獲究出徐四開賭情事而祿康於初六日早閒始將徐四訊問其爲聞風掩飾豈非

欲蓋彌彰此一節獲咎較重祿康者交都察院嚴加議處其祿康
本日交出各犯著與見在拏到各犯均著軍機大臣會同刑部嚴
審定擬究竟祿康有無知情一併據實具奏其步軍統領衙門番
子頭目王鑑等於偵緝匪徒是其專責乃內城有此等開局賭博
之事全不過問並敢於提督屢次詢問之時任意蒙蔽其爲知情
朋比玩法分肥已可槩見並著歸案審訊加以懲創尋議上得旨
祿康前在步軍統領任內因其賦性軟弱特換文甯管理嗣因文
甯降調一時簡任乏人仍令祿康兼管乃前後在任數載於地方
應辦事件一味廢弛毫無振作罷軟無能又非若明亮尙有軍功
可紀本日都察院議上奏請褫職本應照議罷黜姑念祿康供職
有年時常患病著革去太子少保內大臣東閣大學士管理吏部
事務步軍統領稽察欽奉上諭事件處經筵講官閩兵大臣管理

戶部三庫事務崇文門正監督國史館總裁管理右翼宗學管理

西洋堂紫禁城騎馬並拔去花翎加恩降爲正黃旗漢軍副都統

○甲寅召勒保來京以百齡爲兩江總督德文爲左都御史轉哈

甯阿爲禮部左侍郎調凱音布爲禮部右侍郎由盛京禮部侍郎調○丙辰

加劉權之鄒炳泰托津太子少保○以松筠協辦大學士仍留兩

廣總督任調恭阿拉爲兵部尙書由工部調○丁巳命勒保爲武英殿

大學士○以吉綸爲工部尙書貢楚克扎布爲理藩院右侍郎由副都統

都統○以花尙阿爲盛京禮部侍郎由副都統○以穆克登額爲直

隸泰甯鎮總兵官轉景祿爲刑部左侍郎以成甯爲刑部右侍郎

由大理寺少卿遷○戊午諭向來九卿科道等遇有條陳剴劾俱封章入

奏呈遞時面交外奏事官轉交內奏事太監直達朕前拆封卽行

披覽其摺內所奏何事無論外聞不應有人傳播卽內奏事太監

等亦無由得見杜漸防微立法至爲嚴密上月二十八日御史韓鼎晉密奏內城有開場聚賭之事當命軍機大臣傳到該御史詢以所指何人卽於二十九日由該御史自行覆奏朕始令步軍統領祿康等密行查拏節據先後拏獲賭局共一十六起內有八起於五月二十八二十九兩日散局顯係得信逃匿若非有人洩漏或有人探聽御史條奏此事潛向告知致令逃匿而何此時朕姑不深究其人嗣後九卿科道等有陳奏事件如呈遞之前或奏事處及在朝之人向其詢問所奏何事著卽指名參奏若無人詢問而具摺陳奏之後或向外人敘說亦著聞其言者立即揭參均當加之懲治庶不至嘉猷人告以採納之資啓漏言之漸蓋君不密則失臣朕斷不肯先行曉諭以致敢言之臣招怨而臣不密則失身近日此風甚熾朕生平最惡者探聽朝政先欲得信之人樞機

之發榮辱所關有不可不慎者勿謂朕語誠之不早也如敢干犯決不輕恕將此通諭知之○乙丑湖南按察使傅鼎卒 上念其

經理苗疆功予祭葬如巡撫例並加賜祭一次○以沈長春爲湖

南按察使

由直隸天津道遷

○丙寅諭嗣後滿洲六部侍郎年至六旬者

著照向例准其坐轎至理藩院侍郎非六部侍郎可比雖年逾六旬仍不准坐轎著爲令○諭軍機大臣等景安奏臬司傅鼎因病身故一摺已明降恩旨加銜賜卹矣傅鼎辦理苗疆屯防一切事務綏撫得宜該苗民等畏威懷德聞其遠逝自必同深哀悼備有願至其靈前祭奠者不必禁止或有請爲建祠者卽許其建設並著景安書扁懸挂至湖南辰州永順二府三廳一帶苗民雜處爲邊疆要地從前傅鼎鎮撫有法久臻甯謐著景安傳諭見任道員姚興潔於該處應辦各事宜惟當以傅鼎爲法所有傅鼎舊定章

程自皆妥協務遵照辦理○丁卯以榮麟爲倉場侍郎

由內閣學士遷

東華續錄

嘉慶三十二

臣王先謙敬編

臣周澐蕃恭校

秋七月戊寅調陳希曾爲戶部右侍郎錢楷爲工部左侍郎○加光祿寺少卿盧蔭溥四品卿銜命在軍機大臣上學習行走○邵洪以疾免以帥承瀛爲禮部右侍郎由左副都御史遷○己卯以茹棻爲內閣學士由少詹事遷○辛巳以溫汝适爲左副都御史由太僕寺卿遷○壬

午景安以病乞解任允之調廣厚爲湖南巡撫以錢楷爲安徽巡撫轉顧德慶爲工部左侍郎以初彭齡爲工部右侍郎由順天府府尹遷○甲申以景安爲內閣學士前湖南巡撫○壬辰諭西洋人居住京師

原因其諳習算法可以推步天文備欽天監職官之選昨據管理西洋堂務大臣查明在京者共十一人除福文高李拱辰高守謙

三人見任欽天監監正監副南彌德在內閣充當繕譯差使又畢學源一人通曉算法留備敘補賀清泰吉德明二人均年老多病不能歸國此外學藝未精之高臨淵等四人俱已飭令回國見在西洋人之留京者止有七人此七人中共有官職差使者出入往來俱有在官人役隨地稽查不能與旗民人等私相交接其老病者不過聽其終老不准擅出西洋堂外人亦不准擅入管理大臣及官員弁兵巡邏嚴密諒不至有聽其傳教惑眾之事至外省市方本無需用西洋人之處卽不應有西洋人在境潛住從前外省拏獲習教人犯每稱傳播始於京師今京師已按名稱數徹底清釐若外省再有傳習此教者必係另有西洋人在彼煽惑地方匪徒私自容留不可不加之厲禁除廣東省向有西洋人來往貿易其居住之處應留心管束勿任私行傳教有不遵禁令者卽按例

懲治外其餘各直省著該督撫等飭屬通行詳查如見有西洋人在境及續有西洋人潛來者均令地方官查拏具報一面奏聞一面遞交廣東遣令回國如地方官辦理不力致令傳教惑眾照竊定條例嚴參重處若內地民人私習其教復影射傳惑者著地方官一律查拏按律治罪將此通諭知之○癸巳以慶旂爲湖南按察使

由甘肅西甯道遷

○乙未諭兵丁楊帽俊因妬姦故殺本管把總李

定祥身死刑部以李定祥自取陵辱應同凡論將楊帽俊問擬斬候具奏朕詳覈案情楊帽俊李定祥先後與楊吳氏姦好是晚楊帽俊正在楊吳氏家姦宿適李定祥潛往叫門楊帽俊卽以汎官不應與民婦通姦向其挾制致彼此爭罵揪毆楊帽俊先將李定祥截傷自知難免問罪復恨其奪姦隨起意截殺李定祥心坎殞命李定祥係楊帽俊本管營官如因姦宿民婦輒將所管兵丁陵

辱以致兵丁氣忿爭毆致命則是死者有罪逞兇者本係無罪之人應以凡論但科其故殺之罪今李定祥楊惲俊同與楊吳氏通姦均係有罪之人楊惲俊因妬姦逞忿刃斃本官干名犯義目無法紀若竟以凡論殊覺無所區別楊惲俊一犯問擬斬候秋審情實亦必予勾著卽行正法餘照該部所擬完結嗣後遇有兵丁故殺本官之案若兵丁亦係犯罪之人與本官犯罪同者著照例問擬斬候仍請旨卽行正法○丙申 上啓鑾秋獮木蘭○免經過地方額賦十分之三○壬寅 上駐蹕避暑山莊○癸卯諭據百齡奏稱查勘海口上下未經挑挖處所尙俱深通卽馬港口以上河身雖經減壩奪流存水亦尙及丈惟中段挑濬之處轉已涸成平陸詢之河兵土人等僉稱去歲挑河所挖之土卽在河灘堆積並未遠移隄外今春黃水漫灘衝刷土山坍卸仍淤河內又挑工

盡處之攔潮壩一道放水時壩根起除未淨以致阻梗水中黃水泥沙俱爲壩基攔阻停淤特甚本年凌汛後淮海道黎世序卽屢次將漫水汕開土山必致河身淤墊之故稟明河督陳鳳翔批令俟秋汛後再行籌辦等語上年特派馬慧裕前往南河督辦挑工費帑數百萬乃壩根起除未淨又堆積土山逼近河灘以致水過沙停淤塞幾同平陸馬慧裕係駐工專辦之人實難辭咎著交部議處陳鳳翔身任河臣本年三四月閒倪家灘一帶既有漫溢之處卽應親往相度及早籌辦乃該管道員屢經稟請伊轉視爲緩圖以致河流不暢上游漫口實係該河督因循貽誤且見據奏報棉拐山李家樓復有兩處漫口陳鳳翔著交部嚴加議處其疏防之蕭南同知陳熙守備管友仁邳北通判朱楹守備鄭慶瑤及該管之文武汛官俱著先摘去頂帶戴罪堵築仍交部議處兼管之

徐州道張鼎遊擊孔成一併交部議處○諭軍機大臣等百齡具奏查勘海口情形審度全河局勢一摺所奏甚爲明晰海口見無高仰形迹亦無攔門沙阻滯其受病之處在去年挑挖河身工段內積淤三千餘丈又親至馬港口以下見該處積有淤沙且入海路窄仍以修濬正河爲便所見甚是並擬將竈工尾以下河身加挑寬深兩岸接築新隄夯砌堅實再於七套地方增建減水壩及修復王營減壩後建磨盤埽等工所議均有條理此事卽責成百齡盡心籌畫吳璥久任河督於南河情形素爲熟悉已降旨令其前赴南河隨同百齡辦理一切百齡素能辦事此時責無旁貸務勤思熟計以副委任○乙巳以慶祥爲理藩院右侍郎

由副都統遷

八月辛亥改廣東雷瓊鎮總兵官爲瓊州鎮水師總兵官○壬子棉撈山漫工合龍○甲寅衡齡丁母憂以成甯爲山西巡撫

由刑部右

侍郎

○己未諭鐵保等奏查拏指稱叛裔名目斂取錢物並捏寫

回經妄添不法語句之首從各犯審明辦理一摺新疆回民久經安居樂業薩木薩克遠竄窮邊距喀什噶爾尙有五六千里之遙伊故後其子玉素普窮困無依欲向伊舊日屬下回人斂錢幫助乃沙朶斯等膽敢私通書信藉名惑眾斂取錢物實屬不法鐵保等一經訪聞卽能不動聲色密飭阿奇木伯克玉努斯等將案內首從各犯全數拏獲辦理甚爲妥速鐵保著加恩賞給副都統銜其本任翰林院侍講學士交吏部開缺照例進本哈豐阿著加恩賞給二等侍衛阿奇木伯克郡王玉努斯甫經到任卽差七品明伯克阿布都拉五品頂帶藍翎侍衛愛里巴克依等借清查回莊爲名悉心訪拏搜獲各項字迹解送到案甚屬奮勉玉努斯著加恩賞給大段二匹五絲段二匹明伯克阿布都拉著賞給大段一

匹五絲段一匹以示獎勵愛里巴克依係玉努斯屬下之人令其自行加賞所有案內首從各犯俱著照所奏辦理○庚申增四川成都駐防養育兵九十六名○壬戌 上自避暑山莊巡幸木蘭行圍○戊辰加松筠太子少保

九月丁丑諭軍機大臣等百齡等奏籌計南河工用一摺南河頻年興辦鉅工糜帑浩繁此次必須計出萬全方於國計民生有益若目前暫圖節省將來仍不能一勞永逸則所費必遠過於所省總以工歸實濟帑不虛糜爲準固不可任聽浮銷亦不可有心惜費也至所請各直省督撫鹽政關差司道府州縣等官扣捐養廉一節所奏非是斷不可行國家養廉之設係爲辦公之用若普行攤扣在賢者自以急公奉上爲重不改廉隅而不肖者或因此藉口多方巧取其弊豈可勝言况爲政有體從前辦理軍務費帑數

千萬尙未令官員扣捐廉俸此時豈值爲河工創爲此舉見在所
籌之款已足敷所辦之工但能經理得宜卽爲不負委任也○己
卯命於木蘭東哨門內建 興安大嶺神祠○癸未 上駐蹕避
暑山莊○戊子 上自避暑山莊回鑾○乙未以河南安徽水災

撥長蘆運庫銀五十萬兩備賑○免河南被水之永城縣額賦三
年夏邑縣二年虞城縣一年○瑚圖禮以吏部銓選錯誤降調以

松筠爲吏部尙書蔣攸銛爲兩廣總督鐵保爲浙江巡撫

由喀什
爾參

贊大

臣遷○丁酉 上謁 昭西陵 孝陵 孝東陵 景陵 裕陵

○戊戌諭軍機大臣等百齡等奏查明李家樓漫水安徽兩省被
災情形籌議辦理緩急次第又興挑減壩以下河身淤墊各一摺
本年江境雨開漫口見有王營減壩李家樓兩處鉅工未堵其被
災地方亦廣朕宵旰焦勞時時軫念普天之下未有重於此事者

百齡等所奏欲堵減壩必須大挑雲梯關內外河身欲堵李家樓必須大挑邳北上下河身減壩不能遽堵李家樓亦不能卽堵此乃事理之自然原不待煩言而解惟有設法趕緊辦理成功愈速則人事盡而災患可弭見在減壩以下挑工業已分段興挑若如百齡等所議俟減壩工竣再籌辦李家樓濬河築口之事此則實不能待朕已通盤籌畫惟有將王營減壩以下挑工同時並舉可以將時日趨前於全局補救甚大在該督等之意不過以帑項不足工員不敷二事爲詞昨不待奏請已發給長蘆備辦直隸水利銀五十萬兩茲又降旨令粵海關撥給銀五十萬兩迅速解工應用僅仍有不敷據實奏請朕不少靳惜其需用工員奏請到日亦卽發往想該督等亦更無掣肘難辦之處至若仍執借黃助清之說遷延觀望此則太不權利害輕重大小甚屬非宜非大清之臣

僕矣從古治河重在宣防皆以河決爲患未聞有言河決轉受其益者刻下安豫十餘縣災地盡在洪濤巨浸之中民情急迫其可虞之處昨降諭旨已言之甚明且該督等此次摺內並言洪澤湖已日形漲滿開放智禮二壩之後又須啓放仁壩是黃水入湖不但無益且恐有害見值霜降水落之時湖內尙不能容若李家樓漫口不及早堵合明年伏秋大汛漲水日增安豫被災之區益形泛溢所不待言而以全黃之勢直注洪湖設圩堰不能保守其患尙可言乎彼時不但河工無從措手漕運又將如何措辦百齡等豈可輕聽曲說而不遠慮及此至該督等見欲於蕭南工次搭蓋棚廠姑示剋期進堵以安民心此說亦非長策民不可欺指日汎水方來漫口未築何忍將此數十萬良民盡付洪水不思援救朕承天考付託豈肯爲此暴虐之事朕銳意速辦以贖己咎著

百齡等卽遵照昨降諭旨剋日興挑李家樓以下河身淤墊其所需人夫不患短缺王營減壩以下挑工所用者係海沭一帶民夫李家樓以下挑工切近安徽河南被災各縣一聞興舉大工數十萬之夫可以一呼而至旣可以工代賑使災民藉資餬口並可曉諭該處紳士使知國家不惜重帑同時趨辦鉅工用以救災恤患恩意傳播民情自必大安其李家樓以下挑工亦著分爲三段吳璥雖不能奔走河干若專駐一處督辦伊力所優爲著伊承管一段徐端承管一段張鼎承管一段百齡等卽酌分派定並每段各撥給委用員弁示期一同興挑愈速愈妙但不可稍有草率挑工一竣王營減壩合龍後卽將兩處熟諳工程員弁人夫併力堵築李家樓漫口如此同時興工而次第自在其中可冀於明年桃汛前使河復故道以拯災黎以釋朕憂百齡等卽勉力籌辦以副委

任若再飾詞推諉必將倡議之人正法示眾懷之○免被水之江蘇陽山縣額賦三年蕭縣一年安徽泗州額賦三年宿州靈璧縣二年五河縣一年○調史積容爲廣西布政使陳預爲江甯布政使○調福昂爲雲南按察使巴哈布爲江蘇按察使○庚子 上還京師○辛丑諭據豐紳常明奏嶺夷向化改土歸流一招據稱嘉定府戕邊廳通判所屬十二支嶺夷自嘉慶十三年夷目約列等震讐天威率眾投誠奏准卽令約列等充當頭人管束十二支夷眾認納糧石茲該夷人約列等以川省所轄各路土司向有改土歸流之例情願一心向化永作盛世良民並請升科納糧更名易姓一體當差等語該夷人僻處窮邊不通聲教自歸服業經數載漸通內地語言畏法奉公飲和食德今具詞環籲輸忱內附願列齊民著加恩准其改土歸流以遂其膺誠慕義之懷所有戶口

冊籍及升科糧數著該督覈明分別題咨辦理○玉麟以吏部選補錯誤革職以鐵保爲吏部左侍郎高杞爲浙江巡撫

由直隸熱河道遷

○調凱音布爲吏部右侍郎秀甯爲禮部右侍郎○乙巳諭我朝列聖相承敕幾勤政求莫求甯惟以民生休戚爲念無逸知依從無崇尙浮侈之事朕寅承丕緒惟日孜孜時以崇儉黜奢倡導寰宇以冀億兆阜康風俗淳茂萬世子孫皆當恪守卽向來歲時慶節張樂設宴亦以酒醴笙簧惠洽臣鄰綏勸藩服百餘年來垂爲典制其閒日期儀節均有一定從未稍爲增減我皇考高宗純皇帝八旬萬壽爲亘古未有之鴻慶其時臚歡祝嘏尙經頒發聖諭撫抑儀文務崇樸樸前因朕五旬萬壽不敢仰同皇考慶辰盛典因臣民之請止較常年略通燕饗以達下情並不許民間廣陳戲樂巷舞衢歌誠以繁文縟節素非朕心所愉實屬有

損無益每觀往史如前代之侈陳百戲賜酺旬朝方且心薄所爲
引爲監戒况本年南河漫口下游被災各直省亦聞告薄收朕軫
念民艱肝腎莫釋卽值旬慶之年亦必將臚祝靡文槩行裁抑儻
朕稍忘民莫侈舉慶儀各大臣言官等必應上章切諫方爲愛君
之道乃前日御史景德冒昧奏請欲於萬壽節令城內演戲設劇
十日歲以爲例朕兢業萬幾敦崇實政中外臣庶共見共聞景德
竟敢以此言輕爲嘗試其視朕爲何如主耶本應於陳奏之日立
予杖責發遣朕不爲已甚先交部嚴加議處茲部議將該御史照
溺職例革職實屬咎無可寬景德著卽革職並發往威京交觀明
差遣派當苦差威京風氣樸質俾景德在彼覽觀服習當自知其
識見庸鄙愧慙無地也○是月兩淮鹽政阿克當阿違旨密奏百
齡籌辦河工悉心經理不避嫌怨地方及屬員賢否纖悉皆知吏

治爲之肅清惟秉性剛方不免過嚴且河工緩則易辦不能欲速見功以一人之心思恐難敵工員千百人之蒙蔽督撫責任綦重培養尤難仰望曲賜矜全時頒訓誨得旨言官公允字字切實百齡實當代賢臣朕必保護愛惜之汝亦當時常勸導

冬十月己酉改浙江海甯州所屬南沙隸蕭山縣改紹興府同知爲鹽捕同知移駐赭山赭山巡檢爲河莊巡檢駐河莊○乙卯免甘肅各屬自元年至十五年通賦○丙辰調劉大懿爲山東按察使以王紹蘭爲福建按察使

服闋按察使

○壬戌建福建臺灣噶瑪蘭

城設通判縣丞巡檢各一員守備千總各二員○甲子諭多山等奏博士懸缺有關訓課據實奏聞一摺據稱國子監漢博士自嘉慶十四年歷選外省府教授均以告病告休咨部開缺續選之員亦久未到任員缺久懸於課士之道殊多不便等語國子監漢博

士一缺向例由外省府教授推升而府教授多係論俸升轉資深
年老之員往往不能赴京供職應如何更定選法俾人缺相宜不
至曠官著吏部妥議具奏尋奏內外各官例有京升班次國子監
博士輪用升班時專以各省府教授升用擬於雙單月選班內增
入京升一項以學正學錄升用至京外教授推升者亦應勒限兩
月赴部從之○乙丑賜馬殿甲等四十九人武進士及第出身有
差

十一月丁丑內閣學士常英以讀本錯誤降調○辛巳轉慶祥爲

理藩院左侍郎以景安爲理藩院右侍郎玉麟爲內閣學士

由副都統

遷

○己丑周季堂緣事革職調陳若霖爲湖北按察使以溫承志

爲廣東按察使

由糧道遷

○辛卯轉初彭齡爲工部左侍郎調帥承瀛

爲工部右侍郎以汪廷珍爲禮部右侍郎

由內閣學士遷

○以成甯爲刑

部右侍郎衡齡署山西巡撫

前任山西巡撫

○庚子諭百齡奏江南邳宿

運河廳請無庸改隸東省管轄一摺據稱邳宿運河貓兒河一帶古淺之處距徐州僅有一百數十里而距濟甯則有四百數十里一切撈挖雇剝事宜改隸山東運河道不如仍隸徐州道之便且運河道本轄之境已屬路長事劇再加邳宿運河二百五十餘里難免顧此失彼之虞又駱馬湖之蓄水劉老澗之分洩最爲中河一應關鍵其地皆在邳宿運河廳境內改隸兩省尤多未便不若仍循舊章以黃林莊爲兩省分界等語運河分隸章程相沿已久前因巡漕御史周鉞條奏以邳宿運河全資微山湖放水下注請將該廳改易東省一手經管飭交江南山東督撫等會議准行今據百齡等劄陳利弊甚爲明晰亦不必再行交議著照所請邳宿運河毋庸改隸山東一切循舊制辦理又百齡等奏稱江南山東

運河挑濬事宜向歸河員辦理嘉慶十二年巡漕御史文修條陳改歸地方官經理今州縣賠累日多而河道益形淺阻請仍歸河員辦理等語河員專管河務於承辦挑濬事宜自較地方官熟悉且運河平日攔沙蓄溜節宣等事均係河員專責若將挑挖屬之地方官則濬治防守兩易其人轉啓互相推諉之弊嗣後江南山東河運挑濬事宜著仍循舊章復歸河員辦理以專責成

十二月庚戌兩江總督百齡等奏減壩合龍下游諸工完竣得旨獎賚下部議敘賞河道總督陳鳳翔四品頂帶道員黎世序按察使銜徐升敘有差○召袁秉直來京調陳預爲江西布政使以胡克家爲江甯布政使

由淮揚道遷

○癸丑以和甯爲盛京將軍富俊爲

盛京工部侍郎○以貴慶爲盛京刑部侍郎

由大理寺卿遷

○甲寅以廉

善阮元俱爲內閣學士

廉善由詹事府元由少詹事遷

○己未諭陽春慶惠奏嘉

慶十三年內布魯克巴部長喇嘛曲扎仰懇天恩賞賜王爵寶石頂花翎敕書印信等件彼時經文弼駁飭不准嗣十五年内喇嘛曲勒接管部長事務改請賞給諾們汗名號又經文弼陽春各駁兩次駁飭之時均未入奏茲據實查明奏聞等語布魯克巴部落自雍正年間投誠時 賞賜額爾德尼第巴名號嗣後接充部長俱仍前號並無更易今該部長曲扎曲勒僭越妄求該大臣等自當一面駁飭一面奏明請旨何得僅以咨覆了事匿不奏聞甚屬舛誤文弼始終未經具奏著交部加等嚴加議處卽回京候議陽春具奏已遲且此時必係因慶惠到彼查出始行聯名入奏著照所請交部嚴加議處慶惠雖經查出具奏伊到任已經數月其自請交部議處著改爲察議尋議文弼革職陽春降三級調用慶惠罰俸一年從之○庚申以普恭爲內閣學士

由大理寺少卿遷

○乙丑增

浙江玉環廳學拔貢生額一名○己巳以潤祥爲盛京戶部侍郎
由左副都御史遷○甲戌增設江南淮安府外河通判守備各一員○是

歲朝鮮暹羅琉球緬甸來貢○會計天下民穀數各省通共大小
男婦三萬五千八百六十一萬三十九名口各省通共存倉米穀
三千三百三十九萬六百五石一斗一升五合七勺